

Dar weer ok mal en Hochtiedsspaß

Volkslied

Presto

Dar weer ok mal en Hoch-tieds-spaß vun Hans un
Gret'n bi Trin un Klas, un wer dar denn noch sünst mit
weer, dat kann'k ni segg'n, dat we'k ni mehr.
Dsching-de-ring-de-ring di - ral-lal-la, ral-la-la, ral-la-la!
Dsching-de-ring-de-ring, di - ral-lal-la, dsching-de-ring di - ra!

The musical score is written in 2/4 time with a tempo marking of 'Presto'. It consists of five staves of music. The lyrics are written below the notes. The melody is simple and rhythmic, with a mix of eighth and quarter notes. The piece ends with a double bar line.

- 2 As Moder nu allns trech harr kakt,
do wör sik an den Disch gemakt,
do füll er dat mit eenmal in,
dar müss'n doch ok Muskanten sin.
- 3 Un as de Rat beslaten weer,
müß denn ok gliks een los to Peer
hin na so'n ollen Fiedelsmann,
de heel schön fiedeln und blasen kann.
- 4 „Gun Tag, gun Tag, Herr Fiedelsmann,
ik bring ju'n Gruß von Moder an:
ji müch'n gau bet'n röwerkam'
mit all jun Blas un Fiedelkram.
- 5 Ji schulln ok för allen Ding'
dat grot gel Tuthorn mit ju bring'
un ok dat Hackbrett ni verget'n;
denn kriegt ji ok vollop to et'n.”

- 6 De Fiedelsmann dach in sin' Sinn:
So'n Burenköß, de bringt wat in,
denn wenn so'n Bur mal Hochtied het,
drifft em dat ganze Mul vull Fett.
- 7 As he nu keem, do heet dat glik:
Muskant, spel op un mak Musik!
Un Hans un Gret'n as Fru un Mann,
de füng sik dar dat Danzen an.
- 8 Naher do güng dat we'r an't Et'n,
dat harr mit'n Eddelmann sik met'n,
so'n tein Gerichder weern't gewiss
ahn Supp un Plumm un dick'n Ries.
- 9 Un as dat op denAbend keem
un de Muskant sik fix een' nehm,
do güng em dat Besinn'n weg,
he fiedel meistieds achter't Steg.
- 10 Do güng' de Lüd so bi em stahn
un sä'n: Dat mutt ut'n C-Dur gahn!
He awer sä: Lüd, lat ju Tied,
dat C-Dur is mi hüt to wied.
- 11 Sin Söhn de blas op dat Klarnett,
dat güng ok ganz verdeuwelt nett;
he dreih dat Mul so öwerdweer,
as wenn he richtig unklok weer.
- 12 Dat weer ok Nawer Klas sin Knech',
de danz de tweet jüngs Dochter trech,
he danz mit er wull vör de Grotdör,
un dar war garkeen Sticken vör.
- 13 Un Scheper Karl de mak en Spaß,
he seggt: „Lütt Deern, du büst en Baas!
Kumm her, min Deern, un lat mi mal
di küss'nun strak'n de Back'n hendal!“
- 14 Un as de Klock weer riklich een,
do mak'n sik all Lüd op de Been;
de Brüdigam güng mit de Brut,
un mit de Hochtied weer dat ut.